

和韻答侯愚谷

一水環孤寺波光靜不流能來尋舊雨留與聽新
秋翠拂窗南竹紅迷郡北樓自從君去後冷落虎
溪頭

壬辰中秋西雨樓坐月

獨倚危樓望當空月正懸非關一夜短因愛十分
圓秋氣青生眼寒光碧滿天雖然去歲好未必似
今年

寄懷楊覲侯先生

春風吹客過瞿曇曲徑柴門似夙諳正望重逢來

冀北何堪遠夢去天南三秋柳葉愁千里百尺桃花水一潭我欲攜筇遊八閩武夷山色好幽探

輓吳楚源處士

去年曾記廣陵歸過倚闌干咏夕暉今日春殘人不見一庭暮雨濺苔衣

短幅長箋試展開清詞妙句若飛來於今縱購千金價難覓煙雲寫夜臺

和答程晉又先生原韻

一衲何分炎與涼不須辟穀覓仙方閒非愛嬾心如水老不生愁鬢似霜高士唯從黃叔度布衣只

重孟襄陽蒹葭秋水伊人在抱膝風前數雁行

哭及魏塘先生

松寮有淚下遲遲愁向閒窗檢舊詩久病天涯魂已斷難歸旅櫬路多岐殘荷已逐金風碎衰草徒添白髮悲從此東林空結社寸心大地少人知

東郭聽菴先生二律即用原韻

訪戴時懷興可乘其如老作閉門僧涼風黃浦聞秋雁衰柳清淮露佛燈剝啄聲中遺素札行吟病後仗烏藤與君期結匡廬夢白社重尋恐未能閒却牀頭破鐵鞵青山久隔信音乖近來豈是逢

迎嬾老去應將姓字埋笑我枯禪難市酒知君居士畏持齋不然百里扁舟路何只魚書寄水涯

附原倡詩驚羨淮南築上乘端居幸有一詩僧秋天驢放拋空刹露砌蛩鳴咽暮燈黃菊數籬思載酒白蓮舊社想拖藤伴狂披髮形骸苦何故青山卧未能久知方丈有芒屨石負三生俗事乖身老易隨枯柳敗眼昏難共落花埋繫天凉月明歸寺動地西風冷到齋秋水蒹葭歌不得雁聲啼過水之厓

和韻答陳一齋

誅茅最愛水灣環壘土為巖便是山莫惜青鞵常過我平分芋子伴僧閒

與范衣三弟

十年空浪跡白髮已成翁落落逢難弟翩翩愛古

風龍眠生草綠枚里放花紅南北欣攜手春光在客中

孟春樹宗履石慈引三和尚並諸子姪小集山齋漫成

風日晴和草自芳迢遙曲徑到茅堂十年水閣懷人遠千里雲山古道長白首季方甘老鈍青春小阮愛賢良翛然一飯欣相敘欲別還須緩束裝時慈

隱兄將歸江右

和山夫和尚除夕韻

心力空勞歲又窮山夫甘苦略相同春憐和靖梅

應吐才媿江淹句莫工望去白雲除夕夜吹來淑
氣曉窗風重城爆竹聲無盡齒髮稀疎耳未聾

同條一旦總高年敢把光陰不自憐松火緩催寒
氣去辛盤早到舌根先祖庭恬退真完璧

梅姪咸稱得人法雨弘施足補天履兄中興誕登殿堂皆煥然一新惟望春風吹入

戶嬾殘貧病藉安然

再和春雪感懷韻

東風不放柳垂絲孤負章臺好日時難聽鶯聲出
古樹輕飄葉影著疎枝清高雅愜孫康志冷淡偏
工季迪詩一入春來多雨雪撥殘爐火坐更遲

相思往復藕絲絲千里情牽兩地時冀北書煩雲
裏雁浙西人寄隴頭枝長堤難吐青青草絕壑孤
吟澹澹詩借問春風緣底事不吹紅日到檐遲

和竺風法姪韻前題

泥爐著地紙衣單冷水如澆脊背寒擬借陽和安
老病何期春雪到郊壇輕同柳絮連書濕白遜蘆
花照壁殘入夜有人閒不卧瓊樓玉殿一凭闌

次楚璞上人韻前題

雪埋古路人難到鶴怕巢寒夜不還直北聲豪風
動地向南春冷玉成山深深撥出爐頭火曲曲斜

通竹裏關最喜一身總無事半年不過寺西灣

懷章怡澄先生

獨上長堤望先生胡不歸別愁冰雪阻相憶柳花
飛舟楫勞江漢風塵倦布衣錦囊詩句滿好寄慰
柴扉

和殷尊一孝廉見過原韻

攜來尺璧照無方野寺尋梅繞曲廊吹出和風春
意足吟成白雪舌根香羨君標格真豪爽顧我鬢
眉漸老蒼偶過前邨歸較晚溪橋獨立下斜陽
再疊前韻答尊一孝廉

叔度人傳客遠方何來兩度話長廊花生彩筆驚
才大春入閒堤愛草香千里家山雲漠漠十年鄉
夢月蒼蒼如歸小構尖頭屋定傍龍河坐夕陽

和丹圃五弟送別韻時同山夫兄之越

曉挂雲帆去浙東長途無著喜相同深情一往愁
城裏別緒雙牽旅夢中看到鑑湖春水綠歌翻白
苧夜燈紅相思兩地程千里約略歸乘麥浪風

過虎丘

信步尋山到虎丘雲堂問訊冷於秋高低石上千
人坐不見生公使我愁

謂洞明和尚

禮壇

三載懷空切乘春禮塔頭宗風雄一代宰堵聳千
秋幽谷吟春鳥名花放繡球西華誠吉地江水共
長流

贈西華聖機和尚

天上西華夢寐中三年曠別想高風薄披玉版情
何好細煮藤花味自濃老屋半山雲作蓋喬松千
歲影成龍先人靈塔憑君力端望殷勤護始終

雨中望金山

聽說登山興倍濃徒然只咫尺望江峰淮陰屈指三

旬別半在蕭蕭春雨中

送葯齋侍講還朝

時主試闕中

海徼衡文節鉞還清風吹送又淮山聲名久肅朝
中望親串寧因世外刪松壑一天期嘯傲鳳池千
仗復仙班承恩自是褒清操繼武臯夔悅 聖顏

贈少峰吳廣文

延陵家世重龍眠博士才華正壯年何幸三生尋
石上却來一笑契橋邊坐開講席文星遠門閉春
風道力堅不棄野人忻問字芟荷香裏泮池前

梅野法姪住持佑濟

吾宗家世大河邊萬仞門牆已四傳東去逝波須
共警西來密義望重宣龍天推出孤峰上花雨飄
來雙澗前垂老竹林情倍切寒梅忻看一枝妍

將出山示克昌聞谷二子

遠出非無事何須盼我歸山堂勤自埽梅柳任花
飛梵放行苔徑禪餘檢衲衣免予舒老眼慎重守
柴扉

舟中同山夫兄作

屈指三旬旅夢中萍遊南北又西東詩吟虎阜一
江水帆挂洮湖千里風紫燕銜泥春寂寞杜鵑啼

血月朦朧塵襟抖擻還山去穀雨花殘芍藥紅

題梅花扇頭為黃易先

記得西溪樹橫枝挂碧岑孤芳枯衲相寒潔道人
心寄托情何限相思夢不禁江城逢五月鐵笛報
知音

送余茶邨先生陞任海鹽

黃山白岳壓崑崙闕閱文章萃一門本以長才推
國士自饒美錦織天孫鶴湖波靜官如水激浦花
繁邑似邨只此廉明為報績不須三載荷君恩

和韻答汪可舟

曲徑疎籬愧寶坊汪倫到後有輝光閒翻貝葉塵
心靜細撫簪花腕力長旅館好將詩遣興重陽應
愛菊飄香柴桑肯入東林社時渡雙溪問野航

輓栖雲玉大師

四十年來仰止深同條千里更同心貝多在案雲
屏冷夜月窺窗鶴夢沉白業傳薪宗一指青蓮承
足入雙林瓣香勺水情無限纔到西州淚不禁

除夕時同章怡澄先生兩岫問畊兩姪納堂

震維克昌諸子分得十三覃

殘年又欲餞山菴慙愧參寥老不堪一榻梅花寒

舍北十年魂夢繞江南茶香活火良宵永詩就長
箋險韻諳賴得天涯同子姪坐依佳客快清談

送江洛符表兄歸桐山和留別韻

何緣草閣駐扁舟屈指開春十日留送客怕攀將
綠柳倚裝偏促逐波鷗無窮鄉思飛青嶠有限年
華速白頭此去魚書須早寄長淮煙水接江流

香大師小照索題

柴門曲折水灣環隙地栽花當住山更喜風吹青
一片藥苗菜甲滿畦間
不衫不履嬾逢迎何福能消世外情試看溪頭人

作活一家辛苦為謀生

和韻答山陰邵子書山

西窗頻剪燭聽爾話山陰蘭渚亭如故曹娥渡易
尋千秋名士數十載夢魂深有約能相踐孤筇儼
入林

妙叶堂夜話分韻時同章怡澄先生姪雨岫
法姪海平停波西瑞竺風道揆暨納堂克

昌二子

蒼筇恰恰倚斜暉小阮同來興不違却喜人間情
自劇漫憐頭白老無依梅方破蕊香浮几柳漸垂

條綠到扉話久夜深移北斗半窗清影一燈微

懷章怡澄先生

漠漠黃沙暗竹扉故人原訂一旬歸雖然逆旅尊
常滿其奈春風花亂飛鶯坐綠楊聲滴溜草生舊
路步依稀眼前多少閒懷抱雅欲裁詩勸息機

喜雨

條風初破塊南畝事春耕一雨民心慰千丘麥浪
生濕雲仍籠樹布穀不停聲喜極渾忘倦憑闌眼
倍明

和左衍初孝廉韻

略約橫溪到曲廊尋芳惟愛柳蒼蒼一宵春雨苔
初潤三月風光日正長野衲情甘雲水淡孝廉名
重墨花香青蔬旋摘無兼味可肯重來話草堂

雨後郊行

小橋折轉向東郊二月春光寒意消照水幾家桃
爛熳撩人一路柳妖嬈紙錢吹白飛來遠麥隴翻
青望去遙到處蒼生歌舜澤草茅何地有枯焦

舟中懷州司馬丹圃五弟

河上勞相送深情不語中春郊煙黯淡芳樹月朦
朧千里魚書隔澤州書久不到一官雞肋同好將勤國事瓠

子瞻成功

舟中拈送雨岫六姪即用懷丹圃韻

幾日親言笑扁舟泛水中一身空老大雙眼漸朦
朧相對情方慰分行意莫窮詩書兼襆被兩兩束
春風

舟泊夜雨戲吟短句

兩岸菰蒲一葉舟翻盆雨亂旅人愁風如有力吹
將去直到揚州又潤州

登金山遠眺

年年愛此江山勝此會登臨到日曛千尺浪高吞

曉岸一江風闊捲浮雲微茫舟楫窗中見颯踏人
聲樹外聞更把閒情輸老衲名香誦讀夜深焚

和陶泉大姪韻

慰我栖遲一繫舟忻逢小阮聚山樓話餘怕問天
涯路半世萍漂感白頭

親舍依依入望微歸心常逐暮雲飛到今贏得他
鄉老閒把千針補衲衣

破落禪門五柳遮不將冷眼閱繁華六時鐘磬消
經卷更學兒童種草花

雨過閒堦寒乍侵過肩一杖拄龍孫浮生得爾來

相共蔬筍吹香野衲心

千尋飛瀑白於龍吳越山川我素從君去更添東

道主酒杯常把咏高峰

時大姪欲游會稽

送高雲石兄和尚還越中

夢結維摩幾歲寒茅菴何幸共盤桓經談貝葉香
花散詩寫芭蕉墨汁殘岳色匡雲歸竹杖青霜白
雨老蒲團此番準辦還山隱賀監湖邊水月寬

次高旻和尚山樓對雨原韻

高閣雙扉晝啓遲憑闌縱目雨如絲昏煙不辨村
頭屋新水平添檻外池却喜桑麻霑聖澤還宜桃

李豔芳時山居盡日渾無事經卷餘功即咏詩

曹參軍玉符述秋浦勝迹

白筇名勝不虛傳直接芙蓉九點煙樹化老龍盤
巨壑江拖匹練亘遙天清池舊蹟仙留藥繡壁奇
花石吐蓮安得從君經此地芒屨竹杖徧流連

周孝廉枚吉枉過偶論洞濟兩宗原委次韻

奉答

溪環老屋樹蒼蒼風上荷衣透體涼高士說禪如
朗月昔賢崇教凜秋霜原宜一致同人我多事分
門互短長微妙輸君留意久箭鋒不墮立中央

送友用留別韻

寶峰從別後踪跡杳無聞眼底情方慰河邊手又
分一囊攜夜月雙屐破秋雲須記臨岐約登樓日
望君

八月十五夜同宜巖和尚楚章道兄作

令節休空過茶瓜且盡歡光華開月桂皎潔映冰
盤戍鼓聽通夜愁腸起百端江淮三十度孤影照
清寒

示學人曉肆律千華

賓鴻初到夜添長遙憶千華天一方不識峰頭曾

見月一輪朗照自無疆

送宜兄主席法起

石頭慧命一絲懸卓犖如君可力肩家世久傳東
海上新詩曾達 至尊前同心待把宗風振分手
難禁別緒牽彼此繫懷身老大依人門戶費周旋
十年風雨共松扉細論綱宗理事微幻世浮萍難
逆料深山完壁喜先歸九秋白菊憐疎影萬仞蒼
梧悵落暉此去沃州三百里音書莫教往來稀

九日即事

登高懷故國雲樹隔江干鬢鬢驚衰白茱萸共插

難秋光九日老雁影一聲寒向晚西風冷無聊自
正冠

孤鶴吟

閒理翎毛半不全空池照影自堪憐一聲孤唳誰
相和夢斷南山松萬千

半檐偕誕登過宿西雨樓燈下分得十四鹽
何來惠遠與陶潛樓上同栖下竹簾曲几一瓶梅
縹約小窗三日雨簾窳壯懷自撫青春老衰貌相
看白髮添萬柳欲黃游興劇慚無斗酒有雙柑
方遐沚見過

同傍河灣隔一村春風吹渡過柴門徑垂碧柳疑
無路客過蒼苔破有痕高士從來忘禮數嬾僧亦
自省寒溫相留竟日情相得茗椀奇文藉討論

冬日答聽菴見懷原韻

素心正慮遠相違喜惠雙魚到竹扉東郭每懷姜
德隱西樓長夢謝玄暉湖邊衰柳羞青眼山裏寒
梅愛白衣幾欲南城思訪戴翻憐雨雪不霏微

病起游湖上作

杜戶經旬日湖邊忽到來澄波清似鏡瘦面冷於
苔歲月老無賴親朋隔可哀行吟同澤畔照影獨

徘徊

東郭聽菴

閉關歲月老香藤閒殺天涯卧病僧自摘香花供
古佛偶招風雨作詩朋欲尋妙法師雙蝕可奈孤
踪伴一燈南望伊人不可見迢遙雲樹隔千層

題鉢池山與王秀才

往事傳名勝仙踪尚可求火爐空翠落古井冷雲
浮鶴駕移緱嶺鶯笙吹碧樓到今已千載繼起幾
丹丘

巡園

長夏閒何事巡園日幾回
鳥穿叢竹去蝶戀亂花
來剝啄聲空擾軒騰念早
灰無能安我分貧病任
兼催

次敘天見寄原韻

歸棹曾期歲暮過漫天
風雨尚巖阿論心其奈
知音少計日惟添別夢多
白雪一篇憑雁鯉清江千
尺隔藤蘿故山此際梅花
好短杖橫肩待踏歌

除夕

逝水年華似偏憐歲又終
溪光臨夜白松火照樓
紅牢落浮生在飄零旅思
空披衣愁坐聽梅信五

更風

送悟源禪人

壁立人如石安然見老成
休心山寺靜放梵曉鐘
清嫩柳不堪折春風苦送
行好隨歸雁去一路到
燕京

得泮育周先生書却寄

萍泛東西四十春老依山
寺謝風塵遠書乍讀如
金重生計全荒信橐貧看
慣人情心獨冷追思往事
夢空頻微軀落得猶然在
每到花前自愴神

和韻答鄧金槭

沿溪春草逐時芳，綠長蒹葭水一方。為避人煙因
遠市，縱鄰城郭似居鄉。未能免俗還相混，無意成
名自合藏。蔣阜山頭有舊屋，一椽原不羨輝煌。

輓徐古田先生

從今何處問知音，下地茫茫不可尋。水已空流山
寂寞，一林黃葉日西沉。

喜南喬姪至自金陵

小阮南來慰野人，閒窗燈火夜相親。袂分袁浦今
三載，首聚端陽又一旬。淮甸水添梅雨急，秣陵山
變夏雲新。重逢旋作匆匆別，兩地相思入夢頻。

程斗文孝廉同諸公過寺納涼限真字

溪水何妨屢問津，到來儘可息閒身。泉香古鼎生
煙細，蕉綠橫窗過雨新。竹榻常陳留客坐，園蔬旋
擷笑僧貧。洛川才子風流甚，走筆詩成字字真。

和韻寄答宋滋菴孝廉

名並高雲古射州，春山常欲遠相求。自慚有錫飛
難去，望斷東南海上樓。

許謹齋掌科五十初度

要地開青瑣，東臺第一班。直聲留北斗，佳興偶東
山。五十仍玄鬢，千秋自大還。聖朝思補闕，詔下紫

雲間

雪後寄敘天

空明霽雪映高臺一夜梅花開未開却笑袁安貪
穩卧凌晨不策蹇驢來

除夕

節序應除舊風光欲轉新留連將盡夜惆悵未歸
人鄉路懷迢遞天涯歎苦辛青山知久別白業悔
前因家世中凋落宗乘幾屈伸人明增一歲我暗
痛雙親淮水淹遲甚鐘峰盼望頻病多愁易入夢
醒記難真綽約梅如雪稀疎鬢似銀雖嫌添老景
又喜近芳辰松火通宵設辛盤獻歲陳疎鐘驚野
寺炮竹響山鄰曉起開簾幕東風拂面春

寄懷樗關和尚

徙倚高樓聽杜鵑春風幾度落花前新詩欲寄人
依雁曉夢初回月在天琴以無絃還獨撫榻因有
意尚高懸環滁山色應如舊

時駐錫
瑯邪山

望斷孤亭憶智

仙

為楚章大師題小照

回思總角訂交時四十年來志不移今日相逢圖
畫裏寸心惟有兩人知

再和半檐韻

舊榻高懸西雨樓春風十日喜重留詩裁魚網思
偏苦茗熟龍團味自幽白盡鬚眉猶客裏青拖楊
柳又溪頭深山茅屋如營就攜入煙霞細倡酬

盆梅和韻

梅向磁盆放孤山不用尋晴霞烘赤靨鐵幹抱冰
心風雨無勞妬琴書可伴吟何須三十樹方許快
幽襟

次韻答蘇友燕文學

門臨溪水渡庭積落花堆自少了元住何期蘇軾

來茶煙晴未散蓬戶晚猶開他日如重過終須待
我回

癸巳中秋

大地秋光一色清天涯可似故園明懸知今夜兄
兼弟應念羈人白髮生

示克遠侍司

無事休貪一覺眠年將三十豈徒然人生不及山
中豹變化文成只七天

寄東董明府艾庭

筆華燦斗貫文山聲譽高聯玉筍班世著鳳林推

閩閱政成淮水切痾瘵行旌暫得三春暇荒寺來
偷半日閒檢點貧廚惟野蕨期君一飽話松關

賦得不受塵埃半點侵

詩生東閣歷春江白雪爭妍意未降高士本宜居
玉圃紅塵自覺靜紗窗閒尋庾嶺雲千片結伴羅
浮鶴一雙仙骨全然無俗夢不勞山寺曉鐘撞

題張容谷別駕小照

靈和張緒最風流才歷江南古潤州今日逢君圖
畫裏果然名士喜科頭
家世曾傳擁八駟蕭閒宦况自優游高情不愛絲

兼竹却傍花闌學奕秋

奉輓菴菴叔大人

孝廉名早重京華畿甸循良政績誇墨綬自辭湘
水郡板輿迎看洛陽花老多矍鑠吟春雨病忽淪
亡歎暮霞却愧久叨猶子末不禁清淚濕袈裟

張容谷別駕招集仍園納涼與諸公得四支
暑雨生涼催賦詩梧桐綠蔭竹參差使君愛客同
河朔留住斜陽下樹遲

喜半檐至

何意忽然到柴門下夕陽對君忘宿暑入夜况秋

涼蘿月窺窗碧槐風上枕黃匡牀談達旦不覺五
更長

立秋值風雨大作和雨三程先生韻

赤日行天眼倦開快逢一葉落庭來葛衣暑退翻
盆雨冰簟涼生動地雷小切西瓜浮碧玉橫拖蠟
履破蒼苔輞川更有王摩詰

謂象天
主政

賓主賡歌樂未

回

懷大兄大來時三弟楚玉在濟南

雁行三地各分飛故國天南憶翠微淮市鐘聲敲
夢斷金陵月色望人歸季方路遠悲為客小阮情

深勸下帷兄弟家貧子乞食相思不禁淚沾衣

寄懷履兄和尚

新雁偏遲東海邊相思欲寄藉誰傳驚心叢桂開
三徑轉眼秋風別半年山水無情人隔遠池塘有
句夢空懸只今多少閒懷抱盡在蒹葭白露篇

法語拈來若帝珠光芒照徹射陽湖須知十笏無

岐路况是三花本一株衣紫故人多冷落

謂家觀
察公

殺

青名士老偏枯

謂半
檐

迢迢兄弟晨星裏何日山藤晚

共扶

和韻答友

雙溪帶繞梵王宮結社慚非舊遠公坐月僧閒心
似水吟秋客到席生風披開璞玉情何愜讀醒山
鐘夢亦空古渡常來相送處幾株楓葉老霜紅

除夕懷村夫誕登二兄

素浦論文客鹽城說法僧飢寒兩地苦老病一年
增向火尋枯樹炊茶碎薄冰歲終詩句少欲祭笑
何能

常近辰司馬招家息園觀察暨諸名士集樵

雲書屋看梅花分得一東

樵雲舊事不曾同幾樹梅初放眼中心白雪叢叢霏

玉屑丹砂片片碎猩紅江城吹去香猶在紙帳尋
來夢已空徒倚高軒還索句一帆未忍別東風

靈巖懷古

盡道夷光泛越來頓教麋鹿走荒臺採香徑杳春
雲怨響屨廊空夜月哀樹裏穹碑偏突兀嶺頭傑
閣自崔巍消沉霸業隨流水莫向山人問劫灰

華山禮石佛像

插天石壁鑿金仙爪髮分明妙相全花似鬘陀開
寶樹水如甘露瀉清泉水通半偈諸緣寂身到孤
峰萬慮捐却指下方昏黑處紅塵擾擾總堪憐

妙山堂詩錄
五
天池雨後野步小憩山亭有作

雨後山光點點青穿松間竹坐茅亭參差燕剪當
窗見宛轉鶯簧倚檻聽塢送茶香分北渚澗迴泉
味勝中泠悠然自得忘機趣多少游人却未經

試燈夜寄誕登清兄

憶共空江渡早潮蒼茫兩點指金焦於今淮甸居
相近十里煙邨入望遙

悲君手足我良朋一隔人間冷似冰去歲久傷燕
市月今朝誰哭上元燈

謂印恒津兄

年來老大志全消回首江天夜寂寥幾度憶君春

夢遠愁聽簫鼓是元宵

途中口占送半檐

依然踏雪送君還惆悵袁江野渡間畏冷小沽淮
市酒逢人怕說馬陵山布帆風急黃河遠客舍梅
開白晝閒兩地迢遙通一水好憑雙鯉寄松關

暮春喜成紫瀾先生見過

珠江玉樹舊知名故國翻憐未識荆邂逅雲堂成
一笑冰盤菜甲饌先生

來游却值暮春天踏破雙溪萬柳煙看待君家無
別物埽將木榻待逃禪

疊前韻答成紫瀾先生

淮水陰深雨後天
山城遠隔一溪煙
肯常蠟屐衝泥過
分與蒲團靜裏禪

次誕登清兄關中見寄

遙指松關頓寂寥
素心人久隔昏朝
山中羨爾拈花笑
老我湖邊結一瓢

自感

浪迹空桑不記年
青鞵筋骨草磨穿
一身多病原同幻
十笏求安且聽緣
溪水情長生遠夢
梅花香老破晴煙
結茅如遂平生願
折脚鐺支古木邊

贈別悅堂法兄

閩海淮南山水遙
五年不復到松寮
屋梁歲歲懷人句
詩草真堪滿一瓢

武夷山遠在南天
北雁音書不易傳
何日結茆栖白岳
息心好與卧林泉

李樸安來自白田
知半檐泥甸草堂
為秋風捲去有感寄懷

乍聞近况倍添愁
老屋奇風一夜休
滿眼茅茨飛敗絮
舉家兒女學乘桴
雨淋葦壁蒹葭水
月照繩牀蟋蟀秋
更是竈頭無一物
米珠薪桂向誰謀

寄懷楊覲侯先生

曾經車馬過松關清論渾如冰雪間自昔春風吹
楚澤於今明月夢燕山三年最易生離別雙鯉偏
難寄往還曳杖相尋應有日重逢好與慰衰顏

寄答楊月峰總戎

長憶牙旗駐楚州得依虎帳共遨游多年遠隔滇
南路千里今懷冀北秋校射親馳金勒馬觀兵高
擁紫貂裘雙魚何幸殷勤寄滿紙寒暄可破愁

寄柏意敘天

往歲雲游聚合難雙魚常怨鏡湖寬於今只尺春

風近十日相思一水寒

答及木齋徐鉢山兩先生見過原韻

不慣入城市終年閉草堂無因尋栗里那得識文
長溪雨花三徑伊人天一方陶公如入社菜甲飽
經霜

多年牽遠夢今喜晤山堂舊雨三冬聚新詩片幅
長層冰破古渡初日上東方同抱荆山恨相看鬢
已霜

瑞初法姪以除夕詩見呈和韻答之

頻剔殘燈坐不眠客中歲月任推遷預愁明日春

風動吹上梅花瘦可憐

逢迎新舊此燈前老大歸山又一年著地煖燒楮
拙火與君守到五更天

素江宿誕登次早履兄偕過半檐函文臨別
得十一尤

雙溪二客不來游零落殘梅古樹頭一夜山窗眠
未穩五更乘月下扁舟

曉風初霽冷如秋到岸垂楊隱寺樓昨夜夢中今
日聚一窗燈火喜相留

仍到斜陽古渡頭依依欲別又還留無情最是長
淮水來去孤舟只載愁

期半檐過履兄誕登以風雨大作不果

交加風雨夜來臨抱膝繩牀自苦吟因與故人曾
有約一宵展轉繫情深

素江徒向夢中尋水滿間階一尺深慚愧山陰乘
夜雪扁舟難及古人心

留別敘天

殘夏匆匆放小舟輕寒帶雨去邗溝故人咫尺難
為別一路河聲繫遠愁

宜兄已來漣水待久不至詩以招之

一杯聞已渡安東十日高樓望眼空雖隔山堂無
遠路不堪離思夢魂中

可奈頻年天一方雲臺山色老蒼蒼相憐兩鬢如
霜雪一樣矜孱泣道傍

重陽後一日半檐鉢山景西擴孫在瞻諸先
生見過偶成

未盡登高興扁舟喜再來雖無桑落醉猶有菊花
開日下西風冷詩成暮鳥催淹留隨意坐衣袂染
蒼苔

重陽後三日赴楊淇益廣文招集大椿樓同

尹半檐徐鉢山吳楚源楊景西諸先生徹
源大師分得禪字

拍板西風嬾說禪大椿樓上暮秋天重陽節早過
三日黃菊花遲又一年斗酒香生高閣上曲闌人
醉夕陽前餐英我媿非元亮烹盡爐煙活水泉

次答張西邨

秋風吹鹿苑秋日敞松樓一徑閒常冷雙溪靜不
流客從野渡入花放古堂幽莫厭空山遠相期信
宿留

次答洪日融見贈原韻

野水能通客到門快看蠟屐破苔痕空階花落原
同雨古殿無風不動旛坐久莫嫌秋冷淡歸遲還
趁月黃昏從來支許交原合蓮社因緣好細論

送尹半檐之沃州

勞勞常使夢魂牽又挂孤帆去海邊九月道塗風
凜冽十年心事話纏綿蒼梧遍野多山鬼洋水滔
天少客船分手臨岐同下淚相思只恐復經年

暮冬答誕登履兄以桂花見惠原韻

秋花忽地向冬開珍重同條手折來青玉案頭香
氣滿何勞驛使寄寒梅

和尹半檐寄懷原韻

我悲君作客君惜我無家白首慙蓮席青衫戀麩
車老梅凌朔雪寒月下烏紗悵望陰平道山城水
一涯

次答姜梅田護法韻

山野無人問君來古渡邊草青消臘雪窗暖罩晴
煙梅柳迎春放茶瓜入饌偏流連相嘯咏夜月上
吟肩

梨花

梨花開幾樹皎潔傍松扉鶴徑雲同住漁莊雪並

飛鴉翎梳處白蟬影照來肥舉世誰能澹空山老
衲衣

盆梅

孤山風味潔移植向柴窰足供窗前賞何煩林下
招影侵書幌靜香落硯池饒轉笑襄陽老相尋過
灞橋

燈花

不假陽和力深宵四照開却添幽夢遠預報故人
來衣冷鐘初動霜清漏漸催天明猶未落肯把寸
心灰

懷友

野寺孤鐘動晚聲小樓夢醒倍含情五更殘月依
淮甸千里飛沙隔浦城雪藕劈開絲斷續風蕉剪
破葉縱橫懷君直向南天望雲變奇峰看不明

送瑞初法姪主席芙蓉

去矣裝將束相看意若何三年淹杖履一旦別煙
蘿帆影風吹遠江聲夢聽多前途須努力歲月易
蹉跎

題林天佑行樂圖

儼然道服戀煙霞抱甕無煩問酒家和靖孤山不

歸去那知琴裏有梅花

和淨名姪原韻

春秋遞謝任蒿萊渡海穿雲不易來
燈照古龕香不斷博山新案又重開

佟鍾山中丞見過

曾聞開府重南天節鉞初臨強仕年
車騎何期來白社風華儼若見青蓮
筆花歷落詩文庫墨汁霏微書畫船
莫比了元能問答難留玉帶寶橋邊

期半檐不至

淵明久不到山堂秋水蒹葭望渺茫
咫尺清江鴻

雁遠一庭白菊帶新霜

因事述懷

只攜一笠一枯藤但問名山便快登
地老天荒猶不顧眼前浮業况春冰

夏日送月弘西堂歸省

此別非無事南歸爲省親高堂待菽水
遠路隔風塵蘭芷三江綠楊梅五月新
行行近膝下舟楫莫逡巡

送程斗文先生北試秋闈

去上黃金百尺臺西風吹滿桂花開
新安夫子枚

橋客洛水名人鄴下才籍重淮南稱鳳友羣空冀
北羨龍媒翻愁留著蘭垣史無復雙溪問渡來

送朱草衣之楚

書劒閒攜去漢陽一舟秋水正蒼茫前頭多少蘆
花岸知有青猿叫夜長

送莊孫北上

草草蔬盤在異鄉舉頭見月上東方孤舟便向長
安道水遠山遙秋夢長

贈別王洲若公子

時渡雙溪到竹扉淡言如聽屑霏霏正欣北牖當

青顧又別南天隔翠微名士果宜揮玉麈才人本
自重烏衣公車計日應重過還向松關坐夕暉

除夕
限春字

世事何干我山居自食貧歲餘一夕在律報萬家

春

是月廿九
日立春

白髮日梳少青燈夜剔頻寸心愁不寐

泉路隔雙親

元旦
限元字

和風旭日麗三元纔入春來鳥便喧瓦雪漸融芳
草潤庭梅乍暖綠珠繁九天宸藻瞻新政萬里
蒼生感舊恩林下嬾殘何所祝玉爐香爇火初溫

留別章怡澄先生即用送別韻

吳越擔囊去春山叫子規路沿芳草綠帆逐暮雲
飛賦別投珠玉含情在鉢衣掩關休望切一月返
柴扉

和楚璞法姪感懷韻

尋山頗有興作賦媿何能雅入青蓮室

謂息園二叔

常依

白足僧

謂誕登履兄

連綿三日雨黯淡一窗燈老大渾無

賴清宵百感增

再和感懷韻

行過村邊又水邊客中活計信天然一犁春雨田

初足三日濃雲山更連花事徒教尋夢裏故人那
得到燈前歸舟準在荷香後不用將書兩地傳

贈洪箕臺惟一昆弟

萍水相逢春雨中翛然客况略相同難尋山寺千
峰曉易落桃花一樹紅寂寂寒燈殘夜夢蕭蕭旅
館破窗風胥江自是多名士誰似君家氣宇雄

同山夫兄自吳中歸

老大耽游興春風破棹還看山同倚杖對月一開
顏髮白身尤健心清夢亦閒追陪千里路俗累覺
多刪

和山夫兄晚眺韻

一雨雲蒸萬壑霞晚來信步徑欹斜青山入眼多
成畫春草無名半是花路轉斷橋溪曲折峰回殘
月樹周遮旅中幸有同心侶閒領風光意興奢

京口阻雨

春雲黯淡萬山連驟雨翻盆勢倒懸千里蒲帆官
驛外十年萍跡大江邊雷生空谷聲沉地風捲山
根浪潑天獨立船頭深夜裏一輪明月半城煙

賦得一片花飛減却春

花謝山窗外春光又欲歸不關飄綠雨逐望卸紅

衣片片隨蜂舞紛紛與蝶飛寸陰良可惜短髮落
同稀

廿四橋夜泛

廿四橋頭水平山堂外舟清談遲薄夜明月泛中

流佛老多才藻

謂徹源和尚

坡公雅倡酬

謂李程諸公

更深游興

盡燈火萬家收

亡徒正曉正得淮陰人也少依余究佛老學性俱
聰慧於繙經之暇好弄筆墨不幸皆早死死後發
其遺篋得書各一卷視之乃詩也嗚呼徒死矣徒
有詩而徒寧死哉爰各取數章附梓妙叶堂詩後
以正諸當世之善詩者或不訶余爲阿其所好也
雍正二年七月朔日岳宗老人書

附錄

長興值雪

正曉

曙菴

忽值他鄉雪蕭然二月春
玉樓寒粟重銀海炫花
新弱柳青無影孤梅白
自勻凭闌聊遠望何處有
行人

夜坐

剪燭西窗下風光入夜沉
一簾人寂寞滿院氣蕭
森寒逼衣裳冷聲殘蟋蟀
吟清宵渾不寐獨抱苦
禪心

顯聖寺同宗魯兄曉望

寺門同一望野色滿前川
花落留香久松高帶露
懸紅霞添曙色綠柳映蒼煙
對景堪歌詠詩成盡
入禪

夜

柴門如帶繞雙溪
寒夜無聊坐竹西
江上人醒千里夢
客中心亂五更雞
窗虛月隱紅燈小
壁破蟲吟白露淒
明日歸期如可卜
片帆珍重挂長堤

登拱勝臺

層巒疊嶂矗空臺
閒裏登臨亦快哉
日落秋江帆影遠
雲橫高嶺雁聲來
樓臺直欲通清漢
竹樹低垂映古苔
搔首凌風幾羽化
下方煙井滿塵埃

山居

風清月淡杳無塵
小築茅菴恰稱貧
移竹栽花消白晝
浮生幾箇是閒人
山後山前人跡稀
春雲靉靄午風微
衲衣不著頭無笠
支肘柴門看鳥飛

秋夜步瑞初兄韻

閒窗靜坐怯秋涼
風送黃花噴鼻香
入夜梵餘鈎竹箔
一輪明月照禪牀

趨錢塘留別克遠師兄

懷鉢攜經出翠微
弟兄牽袂思依依
一帆暫挂錢塘水
莫道孤雲不識歸



